

Bukas nga sulat para sa mga pamatan-on subong

PANAHON NA, MGA ANAK SANG BANWA!

Ipa-uswag kag i-angat ang subong nga halintang sang inaway banwa!

"Panahon..." sundan sa pahina 2



AP *Kaundan*

Panahon na, mga anak sang banwa!, p1
Suldado nangluthang, menor de edad patay, p3
2 R4 riple nakompiska sa ambus sa Moises Padilla, p3
Padayon nga mag-ilig ang bag-o nga mga dugo pakadto sa kaumhan, p4

Mga Balita sa Isla, p6
(Pamatan-on) + (Lider-estudyante) + (Pulang hangaway) = Ka Nikki, p7
Sulat, p8
Halin sa kasyudaran pakadto sa kaumhan kag kabukiran, p10

"Panahon..." halin sa pahina 1

Sa pagsaulog sang Kabataang Makabayan sang iya ika-57 nga anibersaryo sang pagpundar sa sini nga bulan, aton man ginahanduraw ang pagkabaganihan ni Andres Bonifacio agud makilala ang makasaysayan nga kamalahalon sang una nga pungsodnon demokratiko nga rebolusyon kag, sa pagbalik tan-aw, magkuha sang inspirasyon sa tanan nga mga pamatan-on nga baganihan kag martir nga ginhalad ang ila kabuhi kag dugo para sa pungsodnon nga kahilwayan kag demokrasya sang amu sadto nga panahon.

Ang mga baganihan kag martir sa Una nga Rebolusyon Pilipino naglunsar sang armado nga paghimakas agud maangkon ang madugay nga ginahandum nga kahilwayan nga gintapakan sang mga dumuluong nga manugsakop sa sulod sang pila ka siglo. Sila ang nangin inspirasyon sa aton, subong nga mga rebolusyonaryo, nga isganang kag determinado nga makigbahin sa bag-o nga demokratiko nga rebolusyon ilabi na nga ginkuha sang imperyalismong US ang kadalagan sang rebolusyon 1896 kag sa baylo gintukod ang malakolonyal kag malapyudal nga katilingban sa aton nga pungsod. Gani, padayon nga naga-antus ang pumuluyo sa tuman ka malaut nga kondisyon ilabi na ang mga mangunguma kag mamumugon.

Bilang mga pamatan-on Pilipino sa subong nga angkon ang rebolusyonaryo nga militansya ni Gat Andres, inyo mayor nga papel nga sugponan ang wala pa matapos nga rebolusyon kag ipakigbato ang soberanya sang pungsod Pilipinas batok sa imperyalismong US kag China, kahilwayan halin sa lokal nga pyudalismo kag pagpalayas sang rehimen nga ginasumpo sang

burukrata kapitalismo.

Dapat determinado ninyo nga tapuson ang pagpamigos kag pagpanghimulos, kay kung indi, magapabilin nga madulom ang inyo nga palaabuton. Pareho sang bug-os nga pumuluyo, nagapangatangubang man kamu sang mga problema kaangay sang kapi-gaduhon; kawad-on sang trabaho; edukasyon nga kolonyal, komersyalisado kag pasista; nagataas nga presyo sang mga balaklon; atrasado kag imoral nga kultura; problema sa COVID-19; kag ang pagpamatay kag pagpamahug (red-tagging) sang uhaw sa dugo nga rehimen Duterte.

Dapat nga lubos nga uyatan sang inyo nga henerasyon sang pamatan-on nga Pilipino ang inyo malapad nga papel sa pag-sabat sa balati-an sang sosyedad kag magdala sang labi nga ginakinahanglan nga pagbag-o sang katilingban. Agud mahangpan paano radikal nga mabag-o ang subong nga kondisyon, dapat hugot ninyo nga tun-an paano ginkontrol sang imperyalismong US, dalagko komprador burgesya kag mga agalon mayduta ang Pilipinas subongman paano ginalunsar sang sahing pigos kag ginahimuslan ang pungsodnon demokratiko nga rebolusyon nga may sosyalistang perspektiba nga ginapamunuan sang Communist Party of the Philippines (CPP). Ang inyo nga pagpangabuhin upod sa masa amo ang pinakamaayo nga pamaagi nga malab-ot ini.

Indi lang gilayon nga makontento nga pila lang kamu ka gatos. Makahimo kamu sang gamhanan nga kombinasyon sang mga pamatan-on—lamharon nga mamumugon, lamharon nga mangunguma, mga estudyante, wala nageskwela nga pamatan-on, pamatan-on nga propesyunal kag migrante nga pamatan-on. Epek-

tibo nga pukawon, organisa-hon kag pahulagon ang malapad nga isip sa inyo nga hanay kag malig-on nga maghimakas para sa demokratiko nga kinamata-rung kag interes sang pumuluyo, sa kasyudaran ilabi na sa kaumahan.

Kinahanglanon kamu sa indi mapukan nga paghili-usa sang tanan nga ginapigos kag ginahimuslan nga sahi kag pwersa batuk sa mapintas kag sapatnon nga kaaway sa sahi, nga ginarepresentahan subong ni Duterte, kag sang ila mga imperyalista nga amo. Panahon na nga magpasakop sa New People's Army (NPA) agud labi pa nga mapataas ang inyo politikal nga kamuklatan kag paghangop sa armado nga rebolusyon. Magtinguha nga maka-amot sa pagpa-uswag kag pagpa-angat sang halintang sang inaway banwa. **AP**

NOBYEMBRE 2021



ANG **Paghimakas**

Nagapasalamat ang *Ang Paghimakas* sa mga kontribusyon agud mangin madinalag-on ang ini nga isyu. Sa pagpauswag sang aton *Ang Paghimakas*, ginapangabay sa tanan nga bumalasa nga padayon nga magamot sang mga balita, piktyur, istorya kag iban pa nga sinulat. Nagapangayo man kami sang inyo mga suhestyon kag komentaryo paano pa gid ini pauswag.



angpaghimakas@yahoo.com



fb.com/negros.angpaghimakas



negrosrevportal.wordpress.com

Suldado nangluthang, menor de edad patay

PATARASAK NGA NAGPANG-LUTHANG ANG ISA ka katapu sang 94th Infantry Battalion (94IB) nga si Sgt. Lito Valdevieso sa diin patay ang isa ka 15 anyos nga babaye kag pilason si Felix Estomo, 52 anyos sa Brgy. 1, syudad sang Kabankalan, Negros Occidental, Nobyembre 10.

Natabo ang nasambit nga insidente matapos nga nangu-sisa ang biktima kag pilason nga si Estomo sa nasambit nga militar sang mga I.D. kag iban pa nga dokumento angut sa iya pagkamilitar samtang naga-in-om ini sang makahulubog nga ilimnon sa balay ni John Pader-nal sang gulpi ini nga nagbunot sang iya armas-luthang kag gintiro si Estomo.

Nakadalagan pa-gwa sang puluy-an si Estomo apang gin-lagas ni Valdevieso kag liwat nga nangluthang rason nga na-pilasan ini apang nasalabat kag patay ang menor de edad nga bata ni Pader-nal nga yara sang natabo ang pagpangluthang.

Samtang masobra 150 ka mga pamalay ang apektado sa pagkordon sang gatos ka gin-tingub nga pwersa sang 62IB kag Philippine National Police (PNP)-Guihulngan sa Sityo Par-kingan, Brgy. Trinidad, Guihul-ngan City, Negros Oriental, nga nagsugod pa sang Nobyembre 3 tubtob subong.

Nagtuga ang nasambit nga pagkordon sang kakugmat kag halit sa mga pumuluyo sa lugar sa diin ginapahug kag ginalimi-tahan ang ila paghulag kabahin na ang mga opisyaes kag tanod sang barangay. Mangin ang mga pampubliko nga salakyan nga ang ruta yara malapit sa erya ang ginadumili-an. **AP**



#NPANegrosOffensives

2 R4 riple nakompiska sa ambus sa Moises Padilla

DUHA KA R4 RIPLE ANG naku-ha kag indi magnubo sa siyam ang napatay kag madamu ang napilasan sa bahin sang militar sa masobra isa ka oras nga lukpanay sang gin-ambus sang yunit sang NPA sa idalum sang Leonardo Panaligan Command (LPC-NPA) ang gintingub nga pwersa sang 62IB kag 79IB, Philippine Army (PA) sa dulun-an sang Sityo Nakuruhan kag Sityo Maluy-a, Brgy. Quintin Remo, Moises Padilla, Negros Occidental, Nobyembre 3, 2021, alas 3 PM.

Subongman duha ka sepa-rado nga pagharas sa tropa sang 94IB ang natigayon sang LPC-NPA nga nagresulta sang indi magnubo sa tatlo ang na-patay nga suldado, sa Brgy. Mandapaton, La Libertad, Negros Oriental, Oktubre 17, 2021 alas 2 PM kag Brgy. Amontay, Binal-bagan, Negros Occidental, Nob-yembre 9, 2021, 7 PM.

Suno kay Ka JB Regalado, tigpamaba sang LPC-NPA, ma-

sobra na sa isa ka bulan nga nagahiwat sang operasyon mi-litar ang tropa sang Armed Forces of the Philippines (AFP) sa binukid nga bahin sang Bi-nalbagan, Isabela, Moises Pa-dilla, Negros Occidental, Gui-hulngan, Vallehermoso, La Li-bertad kag Canlaon City, Neg-ros Oriental nga masupog nga nagapadayon sa desaparado nga pagtinguha nga tapuson ang armado nga rebolusyon nga gi-nalunsar kag ginasuporta sang malapad nga pumuluyo.

Dugang pa ni Regalado, ang masa nagademanda sang hustisya sa mga krimen nga natuga sang militar, kag ang mga taktikal nga opensiba sa Central Negros mga sabat sa ila demanda nga silutan ang mga abusado nga berdugo nga militar kag may utang nga dugo sa pumuluyo kag re-bolusyon. **AP**



Padayon nga maga-ilig ang bag-o nga mga dugo pakadto sa kaumhan

Mensahe sang Kabataang Makabayan - Negros sa mga pamatan-on nga Negrosanon

KITA NGA MGA PAMATAN-ON SA subong, ang yara sa tunga sang nagkalain-lain nga makasaysayan nga pangkalibutanon nga krisis: halin sa pangkalibutanon nga pandemya, ang wala-tupong nga resesyon sa ekonomiya kag ang masingki nga pasismo sang estado sang tagumatayon nga rehimen Duterte. Athag, ini nga mga ekstra-ordinaryo nga tini-on ang nagakinahanglan sang ekstra-ordinaryo nga mga talaksan. Indi ini ma-utod sang utok-negosyante nga paminsaron. Dapat magkuha kita sang mas dako nga pag-uswag samtang lapnagon ang sirkumstansya sa pagpasingki sang rebolusyon, kag ang mga pamatan-on pirme ang dugo kag kabuhi sini.


Kaangay sang mainantuson nga pagpalig-on padulong sa First Quarter Storm, hinanali nga ginatawag ang mga pamatan-on nga Pilipino sa subong agud sugpunan ang ila makasaysayan nga papel bilang makusog nga pwera sang rebolusyonaryo nga pagbag-o. Samtang naga-pintas ang kaaway kada-adlaw, ginatawag kita agud liwat nga itukod kag palig-unon ang aton hanay. Aton palaparon kag konsolidahon ang pareho naton nga mga pamatan-on samtang labi sila nga ginahamulag sang subong nga reaksyunaryo nga estado.

Labi nga hayagan nga ginawasak sang krisis sa ikaayong lawas ang daan na nga dunot nga sistema sa edukasyon, sa diin nagapabilin nga kolonyal, komersyalisado kag kontra-demokratiko. Pinakamalala, indi pryoridad ang edukasyon sa 2022 nga badget, madamu sang mga buluthu-an kag unibersidad nga naga-agum sang pagbuhin sa badget. Ang kontra-pigado nga distance learning ang nagpasaka man sang kaso sang mga paghikog nga may angot sa edukasyon. Mangin ang plas-

tada sa diin ang hilway kag luwas nga liwat nga pagbukas sang pisikal nga klase ang makapulung-aw, bangud wala sang athag nga plano kag pundo nga nakatalana para diri.

Mangin labaw pa sa apat ka pamusod sang eskwelahan, ginatatubang man sang pamatan-on ang ekonomiya nga nalubong sa resesyon kag ang makasaysayan nga krisis sa kawad-on sang trabaho. Madamu sang mga pamatan-on nga ma pwera nga ma gwa sa pungsod para magputoy-putoy trabaho sa mga imperyalista nga pungsod. Ang aton maalam nga mga siyentista, enhinyero kag iban pa nga mga intelektwal ang indi magtin-ad sa sini nga malakolonyal kag malapyudal nga ekonomiya.

Daan na nga paslaw kag nagugot ang mga pamatan-on sa reaksyunaryo nga estado bangud sa iya kawad-on sang kapasidad nga sabton ang nagsinampaw nga krisis nga nagatublag sa aton. Wala sang makasabat sa madugay na nga problema sang pamatan-on nga Pilipino kundi ang kadalag-an sang pungsodnon demokratiko nga rebolusyon nga may sosyalista nga



perspektiba.

Kag sa pagdumili sang NTF-ELCAC sang mga ginatawag nga “subersibo nga mga libro” sa diin kaangid sang pagpangsunog sang libro sang mga Nazi ni Hitler sa Germany, klaro ini nga indi gusto sang reaksyunaryo nga estado nga mahibalu-an sang mga Pilipino nga pamatan-on ang rebolusyon Pilipino. Sa pagkamatuod, tuman sila nga nahadlok sa nagasaka nga isip sang mga militante nga mga Pilipino nga pamatan-on. Gani, padayon nila nga ginapakalain kag ginapalapnag ang mga sala nga mga propaganda batok sa Partido, sa NPA kag sa iban pa nga mga rebolusyonaryo nga pwera.

Sa ila desperasyon, ila man ginatarget ang ligal demokratiko nga kahublagan masa sa kasayudaran nga nagapanguna nga nagapakigbahin sa parlyamentaryo nga paghimakas. Tungod sa sini nga mga atake, kag amat-amat nga pagdula sang demokratiko nga mga espasyo, ang reaksyunaryo nga estado mismo ang mayor nga nagatulod

"Padayon..." sundan sa pahina 5

"Padayon..." halin sa pahina 4

nga pwersa sa pumuluyo nga magsulod sa likom.

Apisar sang manugluto na nga kondisyon para organisahon ang madamu pa nga mga pamatan-on pakadto sa rebolusyonaryo nga hanay, dapat man naton andaman ang ila mga kina-ya kag tendensiya nga hapos lang hingalitan sang mga kaaway. Kapin pa masami sa mga pamatan-on ang naghalin sa peti-burges, dapat man naton itib-ong ang giyera batok sa dekadente kag liberal nga kultura nga ginpatuman sang karaan nga pyudal kag subong nga neokolonyal nga plastada. Hatagan naton tum-ok ang kamalahalon sang kolektibo nga pagpangabuhi, batok sa indibidwalista nga diwa nga katuyuan lamang nga alagaran ang subong nga kahimtangan. Gani, yara ang hinanali nga kakinahanglanon para sa rebolusyon sa kultura nga nagasulong sang pungsodnon, siyentipiko kag maka-masa nga kultura kag sa diin naga-selebrar sang rebolusyon kag sang Hangaway sang pumuluyo.


Ginakahangaw-an man ang mga pamatan-on sa mga sari-sari nga ideyolohiya nga gina-

maskarahan ang ila kaugalingon nga mga rebolusyonaryo apang sa pagkamatuod ginapanginwala ang kakinahanglanon sa pagtib-ong sang pangmalawigon nga inaway banwa. May tendensiya nga masobrahan ang pagka-desaysibo sang reaksyunaryo nga eleksyon sa pagduso sang pangmalawigon kag matuod nga pagbag-o, ilabi na nga 52% sang rehistrado nga bontante ang nag-halin sa mga pamatan-on. Ma-kit-an sa sini lang nga substitusyon nga kapaslawan kag wasak nga alyansa sang Duterte kag Marcos Jr., ang elektoral nga sistema ang ginahimo lamang nga hampang sang mga manggaranon. Ang ila paghigko sang aton elektoral nga sistema ang nagapakita sa aton sang natura nga ilusyon sang sini nga ginatawag nga pagpamit sang demokrasya. Dapat naton iangat ang diskurso pakadto sa rebolusyon, kag indi dapat naton pagtugutan ang malapad nga masa sang pamatan-on nga mahulog padulong sa parlyamentarismo.

Ang pagpangibabaw sa sini nga mga burges nga tendensiya kag pagremolde sa kaugalingon ang mainantuson kag pangmalawigon nga proseso, apang indi ini imposibli. Wala sang naga-

pabilin nga nagapundo bangod permanenti ang pagbag-o. Matuman lamang ang aton pagremolde kung madalum naton nga i-upod ang aton kaugalingon sa paghimakas sang mga mamumugon kag masang mangunguma. Indi kita dapat mahadlok sa mga sakripisyo kag kabudlayan. Ang malapad nga kaumhan sang Negros, sa diin tuman nga nagakonsentrar ang pyudal nga pagpanghimulos, ang nagapanawagan sa aton nga ihatag ang aton nga kusog, pagkamatanugahon kag militansya.

Sa tradisyon sang mga rebolusyonaryo nga martir halin sa hanay sang mga pamatan-on nga Negrosanon kaangay ni Leonardo Panaligan kag madamu pa, kita man, dapat ipasiguro nga padayon nga mag-ilig ang mga bag-o nga dugo pakadto sa kaumhan, sa diin ginatib-ong ang makatarunga-non nga giyera agud hilwayon ang pumuluyo sa kadena sang imperyalismo, pyudalismo kag burukrata kapitalismo. Sa sini lamang maangkon sang bug-os nga pumuluyong Pilipino ang makatarunganon kag pangmalawigon nga kalinong. **AP**





MGA BALITA SA ISLA

Panawagan nga mapabalik sa ulubrahan

Nagpatigayon ang Baciwa Employees Union sang akyon protesta para liwat nga ipanawagan sa myembro sang Board of Directors (BOD) kag mismo kay Mayor Evelio Leonardia ang pagpabalik sa ila sa ulubrahan matapos sila ang iligal nga ginpangkakas angot sa ika-duha nga kadalag-an sa desisyon sang Civil Service Commission-6 nga ibasura ang Motion for Reconsideration sang Board of Directors sang City Water.

Gin-updan sang mga konsumedor kag progresibo nga organisasyon sang mga mamumugon ang amo nga aktibidad sang mga empleyado nga ginhiwat sa atubang sang BACIWA District Office, Nobyembre 8 kag 11.

Pagdumdom sang pumuluyo sa ika-tatlo nga tuig sang pagpatay kay Atty. Ben Ramos

Ginhiwat ang isa ka misa sa syudad sang Himamaylan kag ginsugdan sang protesta sang mga mangunguma kag pumuluyo sa syudad sang Kabankalan bitbit ang panawagan sang hustisya sa pagsukat sang ika-tatlo ka tuig nga pagtiro-patay kay Atty. Ben Ramos sadtong Nobyembre 6.

Kadalag-an sang mga mamumugon

Tigayon nga nabayaran sang Amo sa hasyenda ang three years back-claim (2018-2020) sang 16 ka mga mamumugon sa kampo sang hasyenda Vargas, Brgy. Guilhungan, Cauayan, Negros Occidental, matapos sang negosasyon sa tunga sang tag-iya

kag mga mamumugon sa tala-tapan sang Department of Labor and Employment (DOLE) sa syudad sang Bacolod upod ang representati sang nasambit nga opisina kag National Federation of Sugar Workers (NFSW), Nobyembre 10.

Nagpadangat sang reklamo ang nasambit nga mga mamumugon sa opisina sang DOLE bangud apisar sang madugay na nila nga pagtrabaho apang nagapabilin lamang nga manubo ang ila nga sweldo, wala sang kaseguruhan sa trabaho kag wala man mismo sang benepisyo kaangay sang SSS kag iban pa.

Dugang pa, suno mismo sa DOLE nga may mga bayolasyon man ang tag-iya sa mga probisyon nga nasaad sa Labor Standard. **AP**



$$a + b + c = abc$$

**(Pamatan-on) +
(Lider-estudyante) +
(Pulang hangaway)
= Ka Nikki**



"Paagi lamang sa pagpangabuhì upod sa malapad nga masa matukiban sang mga pamatan-on ang ila bug-os nga potensyal" --Kaupod Mao Zedong

DINALAN NGA GINPAMATUD-AN NI CHEENE "Ka Nikki" Dacalos sumugod sang iya ginbaya-an ang naga-inggat nga kabuhi sa syudad agud bug-os tagipuso-on kag lubos panahon nga mag-alagad sa malapad nga masa kag magatuon kag magpangabuhì upod sa ila.

Wala pa man nagpakita ang haring-adlaw kag mabatyagan pa ang katugnaw, apang nagsugod na ang mapanghangkat kag produktibo nga adlaw sa kabuhi ni Ka Nikki sa mala-paraiso nga lasang sang Negros indi bilang isa ka diwata nga mabati-an naton sa mga pambata nga istorya kundi bilang isa ka matuod nga hukbo sang masang mangunguma.

Maalwan, mapainubuson kag wala naga-ulikid sa kaugalingon kung ilaragway si Ka Nikki sang mga lubos nga nakakilala sa iya. Indi man ini malipod sa mga masa kag mga kaupod nga iya naka-upod.

Naghalin sa sahing manubo

nga peti-burgesya, nabun-ag si Ka Nikki sadtong Abril 7, 1991 kag nagdako sa Brgy. Tungkil, Minglanilla, probinsya sang Cebu. Nagtapos nga may honor sa Unibersidad sang Pilipinas (UP) High School sa diin nangin katapu siya sang konseho sang mga estudyante kag publikasyon sa eskwelahan. Tuig 2018 sang nagsulod siya sa UP College sa Cebu sa kurso nga BS Mathematics, maalam kag nagapanguna nga estudyante nga mahilig sa numero, pagsulat kag pagpamuno.

Diri nangin lider-pamatan-on kag aktibista si Ka Nikki nga kutob mintras indi gid malingkang sang reaksyonaryo nga estado. Nangin secretary-general siya sang Nagkahiusang Kusog sa Estudyante (NKE), politikal nga organisasyon sa eskwelahan nga nanguna sa pagduso sa pagpamatuk sang pagsaka sang Tuition kag Laboratory Fees kag sa pagpasara sang UP High School.

Amat-amat nga nahangpan ni Ka Nikki nga wala nahamulag ang isyu sang mga pamatan-on kag estudyante sa pangkabilugan nga isyu nga gina-atubang sang pumuluyo. Tuman nga nabuyagyag sa iya nga ang pag-antus, pagpamigos kag pagpanghimulos sa pumuluyo ang tuga sang naga-ut-ot nga gutom kag kapigaduhon dala sang monopolyo sang kadutaan sang mga agalon mayduta, pagpanghimulos sang mga dalagko burgesya komprador kag garuk nga pang-gobyerno sang mga burukrata kapitalista.

Gani lubos nga namuklat si Ka Nikki sa kamalahalon sang pag-alagad sa malapad nga masang pigos, nga wala lang naga-katapos sa apat ka pamusod sang eskwelahan ang pag-eskwela, nga mas madalum kag malapad ang mahibal-an kung magtuon kag mangabuhì upod sa masa. Labaw sa tanan iya nahangpan nga ma-

"(Pamatan-on)..." sundan sa pahina 8

"(Pamatan-on)..." *halin sa pahina 7*

angkon lamang ang mga handum kag demanda sang pumuluyo para sa kinamatarung, hustisya kag kahilwayan paagi sa armado nga rebolusyon, paagi sa pagpasakop sa NPA.

Tuig 2011, sa edad nga 20 anyos sang gin-usoy ni Ka Nikki ang pinakamataas nga porma sang paghimakas paagi sa pagtapu sa NPA. Diri iya lubos nga nakita ang signipikante kag makasaysayan nga papel sang mga pamatan-on bilang yara pirme sa unahan sang paghimakas sang pumuluyo.

Sa iya isganan nga paghatag sang iya panahon, kinaalam kag talento sa armado nga kabuhi samtang naga-alagad sa pumuluyo iya natukiban ang iya lubos nga ikasarang bilang lamharon. Sa iya tinuig bilang Hukbo sang pumuluyo, nagsugod siya bilang Giya Pangpolitika (GP) sa iskwad kutob sa nangin Political Instructor (PI) sa platoon. Nagtinguha siya nga magremolde sa pihak sang mga kabudlayan sa paghiliusa sa mga kaupod kag baskog pa ang marka sang arogansya sang PTB. Wala kakapoy siya nga nagtuon kag nagatudlo sa mga kaupod sang mga pagtuon, prinsipyo kag pagpropaganda para mapataas ang kamuklatan.

Sa padayon nga pagpanday ni Ka Nikki sang iya kaugalingon bilang isa ka rebolusyonaryo, dalayon nga ginasanto sa kahimtangan kag ginapalambo ang iya nga pagpraktika. Nangin kabahin siya sa pagbreakthrough sa paghimo sang sosyal nga imbestigasyon kag pag-analisa sa sahi sa isa ka barangay, paglunsar sang Sandigan nga Kurso sang Partido (BKP) kag Intermedya nga Kurso sang Partido (IKP) nga mahaum sa kahimtangan sang masa, paghatag sang mga kurso sa Pambansang Demokratikong Paaralan (PADEPA), pagtukod sang mga Lubos nga Asosasyon Masa (LAM), paghimo sang plano sa kampanya kag paglunsar sang agraryong rebolusyon kag kampanyang masa, paggiya sa mga Seksyon Komite kag sanga sang Partido kag pagpakig-alyado.

Nangin Finance and Logistic Officer (FLO) man sa iskwad si Ka Nikki sa anum ka bulan sa diin iya mas napraktika ang pagbudget sa sulod sang yunit kag nakatuon sa paghimo sang mga tikang sa pagkinot kag pagpatuhaw ukon pagpangalap sang mga rekurso.

Tubtob nangin kadre sa larangan si Ka Nikki sa diin siya ang nagatindog bilang tim lider sa istap sang edukasyon. Si Ka Nikki ang naghana sang madamu pa nga instruktur pareho sa iya sa hanay sang mga pamatan-on.

Angkon ang kina-ya bilang pamatan-on, mapagsik siya sa pagpatuman sa trabaho kag gatinguha nga mapalarga ang inisyatiba. Matingkad ang pagkamatuguhon ni Ka Nikki sa pamaagi nga nagapaninguha ilabi na sa panahon nga indi niya upod ang iya nga kolektib.

"(Pamatan-on)..." *sundan sa pahina 9*

SULAT*

Karong adlaw, nisulat mi kanimo
ug sukwahi sa naandan, kini dili
putson o taguan
Ilatad lamang ang papel nga daw
plakard o polyeto,
diin gipatik ang mga awit ug istorya sa
imong kinabuhi—dako ug tibu-ok
Isuksok namo kini sa mga notbuk ug
libro
aron lili-on sa mga aktibista,
ipapilit sa mga pader aron mabasa sa
masa
o padayong bitbiton panahon sa
martsa

Ihanig kining sulat nga daw banig una
matulog
Ablihan nga sama sa duyan human
nga giga-id
sa mga puno-an tunga sa lasang
Bukas sa tanan
Naghulat ug nagpaabot
Sama kanimo, tugutan namo kining
panid
nga mapalid sa mga kadalanan,
mapadpad sa mga katubhan,
bukid ug mga pangpang—mga puluy-
ang imong nakaplagnan,
diin ang ga-antos ug gilupig naglunsad
og pagsukol,
diin ikaw nagsaad nga mu-alagad,
kumkom ang gugma ug damgo nga
bisan sa katapusan,
wala nimo gibuhi-an

Karong adlaw, musulat mi kanimo
apan sa ulihi, alang usab kini kanamo
Tungod kay ang gihalad nga kinabuhi,
buhi nga sulondan,
kompas ug mapa,
tubag sa pangutana,
tambal sa mga pagduda,
mensaheng naghagit sa kabatan-unan
nga musuway pagsubay sa dalang
wala naandan,
sa dalang imong gibaktas
ug gihawan sa walay pagduhaduha **AP**

*Kang Cheene, higala ug kauban. Iskolar ng
Bayan. Martir sa katawhan.



"(Pamatan-on)..." halin sa pahina 8

Kaangay sang mga tipikal nga Hukbo nag-agi man sa krisis si Ka Nikki apang mainantuson niya ini nga ginapangibabawan. Positibo niya nga gina-atubang ang mga sakripisyo kag kabudlayan nga masumalang kag bukas nga ginabaton ang mga pag-saway agud tayuyon nga matibong ang makatarunganon nga armado nga rebolusyon.

"Sa pag-atubang sa mga sakripisyo kag mga kabudlayan, normal lang, total kon kapoy makapulupahuway lang man ang kalawasan kag ang mga budlay mabuligan lang man," suno kay Ka Nikki.

Ang ini nga entusiyasmo ni Ka Nikki ang nagatagos kag nagapanalaptap sa tanan nga mga kaupod kag masa nga iya na-upod. Gani para sa malapad nga masa sang Negros si Ka Nikki isa ka anak, utod, kaupod,

edukador, ahitador kag labaw sa tanan isa ka matuod nga Hanga-way sang pumuluyo nga ila lubos nga ginapalangga.

Ang mabinungahon kag makasaysayan nga kabuhi nga ginhatag ni Ka Nikki upod sa malapad nga masang pigos ang naka-amot sang dako sa pag-angkon sang madamu nga mga rebolusyonaryo nga kadalag-an kag pagpasulong sang armado nga paghimakas ilabi na sa larangan nga iya ginserbisyon.

Namartir man si Ka Nikki upod sa tatlo pa ka mga isganan nga mga Hukbo sang pumuluyo nga sanday Ka Alvin (Jeren Vargas), Ka George (Jonard Alvior) kag Ka Bobong (Alfredo Sinsano) sa kamot sang mga pasista nga mga pwersa sang estado sa isa ka engkwentro sadtong Setyembre 14, 2021 sa Sityo Balik-Balik, Brgy. Tabu, Ilog, Negros Occidental, apang ang kabuhi nga ila nga ginpa-

ngabuhi sang maayo paagi sa lubos nga panahon nga pag-alagad sa pumuluyo ang magapabilin nga preska kag nakatatak sa huna-huna kag tagipusu-on sang malapad nga masa sang pumuluyo.

Napagkit na sa libro sang mga baganihan ang kabuhi ni Ka Nikki upod sa madamu pa nga mga martir sang rebolusyon. Ang nag-ilig nga dugo ni Ka Nikki sa kadutaan sang Negros ang magabunyag sa madamu pa nga lamharon nga binhi sang rebolusyon nga amo ang padayon nga magabuhi sang iya nagakalayo nga mapang-away nga diwa kag magasugpon sang iya wala pa natapos nga misyon nga mangkon ang matuod nga hustisya, demokrasya kag kahilwayan ilabi na ang kadalag-an sang pungsodnon demokratiko nga rebolusyon. **AP**

Halin sa kasyudaran pakadto sa kaumhan kag kabukiran

ni Karylle 11/13/21

Halin sa kasyudaran pakadto sa kaumhan kag kabukiran
Matingkad namon nga nasaksihan
Pag-antus kag kalbaryo sang masang pigos kag ginahimuslan
Nga padayon nga nahigot sa kadena sang malakolonyal kag malapyudal nga katilingban

Halin sa kasyudaran pakadto sa kaumhan kag kabukiran
Mabaskog namon nga mabati-an
Ang naga-isa kag militante nga tingog sang kahublagan masa
Nga nagasinggitan sang demokrasya, kahilwayan kag hustisya

Sa bisan diin nga duog kag hulot sang aton katilingban
Muklat nga nahangpan namon nga mga pamatan-on ang amon responsibilidad kag katungdanan
Nga may makasaysayan kag signipikante nga papel bilang mga paglaum
Magapadayon sang indi pa tapos nga paghimakas sang mga baganihan kag martir sang rebolusyon

Gani halin sa kasyudaran pakadto sa kaumhan kag kabukiran
Bisan ano nga bunal sang mga pasista indi gid mapukan
Ang pag-ilig sang rebolusyonaryo nga dugo sa kada henerasyon

Nga nagasulong sang makatarunganon nga armado nga rebolusyon

Halin sa konkreto nga dalanon nga amon ginamartsa
Bitbit ang mga plakards nga nagapanawagan sang lehitimo nga mga demanda
Padulong sa mapanghangkat kag tunukon nga banas
Banas nga gina-usoy ang armado nga paghimakas
Subong nagabitbit sang armas
Agud sukton kag mapalayas
Ang nagahari nga sahi nga hakugan kag mapintas

Sa kasyudaran man pakadto sa kaumhan kag kabukiran
Padayon nga nagadamu ang mga pamatan-on kag kabataan
Nga isganan nga nagapakigbahin sa pungsodnon demokratiko nga kahublagan
Kahublagan nga seguridad kadalag-an ang padulungan
Bangud ginabitbit sini ang interes sang malapad nga masa
Gani determinado ang mga pamatan-on nga nagapakigbahin sa bag-o nga hangaway sang banwa! **RP**

#JoinTheNPA
#AlagaranAngPumuluyo
#AmplifyTheRevolution

